

四庫全書

子部

欽定四庫全書

子部
冊府元龜卷六百七十二

詳校官中書_臣吳瓌

侍讀_臣孫球覆勘

總校官庶吉士_臣何思鈞

校對官典簿_臣劉景岳

謄錄監生_臣陳樹義

欽定四庫全書

冊府元龜卷六百七十一

宋 王欽若等 撰

牧守部

總序

唐虞之制或十二州或九州州皆有牧虞典所謂咨十有二牧左氏傳所謂禹鑄九牧之金是也三代之制王畿千里之外設方伯五國以為屬屬有長十國以為連連有帥三十國為一卒卒有正一百一十國以為州州

有伯八州八伯亦牧也商曰伯夏周皆曰牧自唐迄周九州之地以封諸侯諸侯賢者乃為州牧又使大夫三人監方伯之國故曰三監秦氏罷侯置守凡三十六郡郡置守掌治其郡秩二千石內郡有丞邊郡又有長史掌兵馬秩皆六百石又置尉掌佐守典武職田卒秩比二千石亦有丞秩六百石又置御史監之漢郡縣丞秦置京兆尹左馮翊右扶風謂之三輔分治長安城中京兆初為內史又為右內史左馮翊初為左內史扶風

初名主爵中尉又為中尉後更今名各置郡尉而諸侯所封之國置內史治民中尉掌武職又省監郡御史丞相遣吏分刺州不常置景帝中元二年更名郡守曰太守郡尉曰都尉武帝元封三年分諸郡為十三部部置刺史掌奉詔條察州內秩六百石其察三輔曰司隸校尉成帝綏和元年更刺史曰牧秩二千石哀帝建平二年又以州牧復為刺史元壽二年又以刺史為州牧郡守之職掌治民進賢勸功次獄除奸嘗以春行縣所至勸

民農桑振救乏絕秋冬遣無害吏案訊諸囚平其罪法
論課殿最刺史之職嘗以八月巡行所部郡國錄囚徒
考殿最初歲盡詣京都奏事皆有從事史假佐後漢皆
因之以河南郡為河南尹省諸郡都尉其職并歸太守
屬國都尉舊主蠻夷降者中興稍有八縣治民如郡安
帝又置扶風及京兆虎牙都尉靈帝末復以刺史為州
牧魏始置都督諸州軍事或領州刺史晉准舊制王畿
置司隸校尉州置刺史京師所治置尹郡置太守諸王

國置內史又涼州刺史領護羌校尉雍州刺史領西戎
校尉荊州刺史領南蠻校尉亦或分置又刺史太守內
史多領將軍中郎將之職元帝中興罷司隸以其職為
揚州刺史宋齊同之自魏已降大抵刺史任重者為使
持節都督輕者為持節都督諸軍事又輕者為假節刺
史治民事其非要州不帶都督則單為刺史謂之單車
刺史梁陳之制刺史二千石受拜之明日辭宗廟而行
揚州南徐州東揚州刺史品第三荆江南兗郢湘雍州

刺史品第四豫益廣衡青北兗北徐梁司南梁交越桂
霍寧州刺史及丹陽尹會稽吳郡吳興太守品第五其
餘萬戶以上郡守內史品第六不滿萬戶太守內史品
第七其秩比二千石單車刺史加督進一品都督進二
品太守加秩亦進一品都督進二品後魏以司隸部為
司州州置三刺史用六品宗室一人異姓二人比古之
上中下三大夫郡置三太守用七品而太守上有刺史
下有令長雖置而不臨民又置大都督總緝軍民北齊

京師所治司州置牧清都置尹餘州置刺史郡置太守
三等上州刺史清都尹三品三等中州刺史三等上郡
太守從三品三等下州刺史四品三等州郡制祿之法
刺史守令下車各前取一時之秩上上州刺史與司州
牧同歲秩八百疋上中上下五十疋為差中上百疋為
差中中中下五十疋為差下上百疋為差下中下下五
十疋為差上郡太守歲秩五百疋降清都尹五十疋上
中上下各以五十疋為差中上四十疋為差中中中下

三十疋為差下上四十疋為差下中下下三十疋為差
幹力聽勅乃給幹輸絹十八疋放其身力則以州郡白
直充後周雍州牧九命三萬戶以上州刺史正八命二
萬戶以上州刺史八命一萬戶以上州刺史正七命五
千戶以上州刺史七命京兆尹八命一萬五千戶以上
郡守正七命五千戶以上郡守正六命一千戶以上郡
守正五命一千戶以下郡守五命而刺史奉辭之日備
列鹵簿又改都督為總管隋雍州牧從二品上州刺史

正三品中州刺史從三品下州刺史正四品京兆尹正
三品上郡太守從四品中郡太守從五品下郡太守正
六品州又置總管以統餘州并益揚荆謂之大總管視
從二品中總管視正三品下總管視從三品其為總管
刺史皆加持節刺史太守皆計戶而給祿大州六百二
十石其以四十石為差於下下則三百石大郡三百四
十石其下每以三十石為差後開皇三年罷郡以州統
縣煬帝即位又罷州置郡郡置太守上郡從三品中郡

正四品下郡從四品京兆河南俱謂之尹正三品舊制州有兵處刺史帶諸軍事以統之至是別置都尉副都尉領兵馬郡不復知兵矣其後郡各加置通守一人位次太守京兆河南則謂之內史而悉罷持節總管之名唐初又以郡為州雍州雒州並置牧餘州置刺史復以雒荆并幽交五州為總管府總管與刺史皆號持節七年改總管為都督督十州者為上都督不及者為都督後又都督刺史加號使持節諸軍事而實無節但頒銅

魚而已景雲二年分置二十四都督糾察所管州刺史
已下官人善惡畿內州不隸都督長壽元年又改并州
為太原府神龍中罷之開元中改為太原府又始置節
度使其后又置諸道採訪使皆以刺史為之節度使以
司戎事採訪使以聽民政天寶元年改州為郡改刺史
為太守至德元年改郡為州改太守為刺史又以益州
為成都府岐州為鳳翔府蒲州為河中府荊州為江陵
府乾元元年改停採訪使俄置觀察處置使興元中以

梁州為興元府光化中以華州為興德府凡唐之制京兆河南太原尹從二品餘尹從三品其屬僚有少尹而下大都督從二品中都督正三品下都督從三品屬官

有長史而下

大都督多親王為之以長史領州務

以領戶滿四萬已上曰

上州刺史從三品戶滿二萬已上曰中州刺史正四品戶不及二萬曰下州刺史從四品其屬僚有別駕下都督而下所掌清肅邦畿考覈官吏宣布德化撫和齊人勸課農桑敦諭五教每歲一巡屬縣觀風俗問百年錄

囚徒恤鰥寡閱丁中務知百姓之疾五代之制並與唐
同昔漢宣帝云與吾共治者惟良二千石乎夫一圻之
地千乘之賦上承於王廟下熙於民務有刑辟之政有
軍旅之事所謂生民休戚之所屬王室安危之所漸故
得其人則成治非其材則受弊至乃仁慈以流聲清白
以飛譽禮讓以化俗公正以御物不懾於威權不溺於
榮利此良吏之最也異悞以取容依阿以附勢殖貨以
厚己苛刻以求名不畏於簡書不卹於惇弱此奸吏之

首也並用考其行事著之於篇其佐吏則附見於幕府
凡牧守部四十二門云

選任

自舜典所載蓋十有二牧以訖于周重方伯連帥之任
秦置郡守漢仍其制或郡或國錯峙於四封曰守曰相
咸釐於兆姓專制千里其為威重可知矣故推擇之際
未嘗輕焉乃有密邇都邑俯介戎貊或豪猾恣橫或寇
攘為孽至乃干戈甫定水旱相仍罷羸賴其惠綏強暴

資其式遏由是選循良之器求真幹之用分符以往專城而居足以為王廟之藩屏黔民之師長者矣

周成王時周公既沒成王命君陳分正東郊成周

成王重周

公所營故命君陳分居正東郊成周公之邑里官司

康王命畢公分居里成周郊

分別民之居里異其善惡成定東周郊境使有保護

作畢命

言畢公見命之書

惟十有二年六月庚午肫

康王即位十二年六月

月三日庚午

越三日壬申王朝步自宗周至于豐

於肫三日壬申王朝

行自宗周至于豐宗周鎬京豐文王所都以成周之衆命畢公保釐東郊用成

周之民衆命畢公使安理
治王成周東郊令得所

王若曰嗚呼父師惟文王武

王敷大德于天下用克受殷命

王順其事歎告畢公代
周公為太師為東伯命

之代君陳言文武布大德于天
下故天佑之用能受殷之王命

惟周公左右先王綏定

厥家

言周公助先
王安定其家

懿殷頑民遷于雒邑密邇王室式化

厥訓

慎殷頑民愁其叛亂故徙于
雒邑密邇王室用化其教

既歷三紀世變風移

四方無虞予一人以寧

言殷民遷周已經三紀世代民
易頑者漸化四方無可度之事

我天子用安邑矣十
二年曰紀父子曰世道有升降政繇俗革不臧厥臧民

罔攸勸

天道有上下交接之義政教有因俗改更之理
民之俗善養之俗有不善以法御之若乃不善

其善則民無所勸慕惟公懋德克勤小物弼亮四世正色率下罔

不祇師言

言公勉行德能勤小物輔佐文武成康四世為公卿正色率下無人無不敬仰師法嘉

績多于先王子小子垂拱仰成

公之善功多于先人之時我小子為王垂拱仰

公成理言其上顯父兄下施子孫

王曰嗚呼父師今予祇命公以周公

之事往哉

今我敬命公以周公所為之事往為之哉言非周公所為不敢枉公往治旌別淑

慝表厥宅里彰善癉惡樹之風聲

言當識別頑民之善惡表異其居里明其

為善病其為惡立其善風揚其善聲

弗率訓典殊厥井疆俾克畏慕

其不循教

道之常則殊其井居田界使能畏為惡之禍慕為善之福所以相勸

申畫郊圻慎固封守

以康四海

郊圻雖舊所規畫當重分明之又當謹慎監固封疆之守備以安四海京師安則四海安

矣政貴有恒辭尚體要不惟好異

政以仁義為常辭以理實為要故貴尚之

若異於先王君子所不好

商俗靡靡利口惟賢餘風未殄公其念哉

紂以靡靡利口惟賢覆亡國家今殷民利口餘風未絕公其念絕之

我聞曰世祿之家鮮

克繇禮以蕩陵德實悖天道

時言我聞自古有之世有祿位而無禮教少不以放

蕩陵蔑有德者如此實亂天道

敝化奢麗萬世同流

言敝俗相化車服奢麗雖相去萬世

若同一流茲殷庶士席寵惟舊怙侈滅義服美于人

此殷眾士居寵

日久怙恃奢侈以滅德義服節過制美於其名以僭上

驕淫矜誇將繇惡終雖收

放心閑之惟艱

言殷衆士驕恣過制於其所以自脩大如此不變將用惡自終雖今順從周

制心未厭服以禮閑禦其心惟難

資富能訓惟以永年惟德惟義時乃

大訓不繇古訓于何其訓

以富資而能訓義則惟可以長年命矣惟有德義是乃大

訓若不用古訓典籍於何其能訓乎

王曰嗚呼父師邦之安危惟茲殷士

不剛不柔厥德允脩

言邦國所以安危惟在和此殷士而已治之不剛不柔寬猛相濟則

其德政信脩立

惟周公克慎厥始惟君陳克和厥中惟公克成

厥終

周公遷殷頑民以消亂階能慎其始君陳弘周三公之訓能和其中畢公闡二公之烈能成其終三

后協心同底于道道洽政治澤潤生民

三君合心為一終始相成同致

于道道至普洽政化治理其德澤惠施
乃浸潤生民言三君之功不可不尚

四夷左衽罔不

咸賴予小子永膺多福

言東夷西戎南蠻北狄被髮左衽之人無不皆恃賴三君之德

我小子亦長受其多福

公其惟時成周建無窮之基亦有無窮之

聞公其惟以是成周之治為周家立無窮之基業於公亦有無窮之名聞於後世子孫訓其成

式惟乂

言後世子孫順公之法惟以治

嗚呼罔曰弗克惟既厥心

之人

為政無曰不能惟在盡其心而已

罔曰民寡惟慎厥事

無曰人少不足治也惟在慎其

政事無敢輕之欽若先王成烈以休于前政

敬順文武成業所以美於前人之政所

以勉
畢公

申伯以賢入為宣王卿士佐王有功王又欲使繼其故
諸侯之事往作邑於謝南方之國皆統理施其法度特
改大其邑使為侯伯故崧高詩云疊疊申伯王纘之事

于邑于謝南國是式

疊疊勉也謝周之南國也纘繼于往式法也

漢邳都景帝初為中郎將時濟南閻氏宗人三百餘家
豪猾二千石莫能制於是帝拜都為濟南守

灌夫為代相武帝初即位以淮陽天下郊勁兵處

郊謂四交

輻輳而兵又勁疆故徙夫為淮陽太守

汲黯為右內史坐小法免官隱於田園會改鑄五銖錢
民多盜鑄楚地尤甚武帝以為淮陽太守黯伏謝不受
印綬詔數強予然後奉詔召上殿黯泣曰臣自以為填
溝壑不復見陛下不意陛下復收之臣嘗有狗馬之心

思報

今病力

力謂甚也

不能任郡事臣願為中郎出入禁闥

補過拾遺臣之願也帝曰君薄淮陽邪吾今召君矣

言後

即呂顧淮陽吏民不相得

顧謂思念也

吾徒得君重

徒但也重威重

也卧而治之

龔遂為昌邑郎中令昌邑王廢髡為城旦宣帝即位久之渤海左右郡歲饑盜賊並起二千石不能禽制帝選能治者丞相御史舉遂可用帝以為渤海太守

韓延壽為雒陽太守治甚有名徙潁川潁川多豪彊難治國家嘗為選良二千石

尹賞為長安令江湖中多盜賊乃以賞為江夏太守坐殘賊免南山羣盜起以賞為右輔都尉

張敞為函谷關都尉宣帝即位廢王賀在昌邑帝心憚

之徙敞為山陽太守後為膠東相時潁川太守黃霸以
治行第一入守京兆尹不稱罷歸於是制詔以敞守京
兆尹後坐事亡命冀州部中有大賊天子思敞功勅使
使者即家在所召拜冀州刺史

蕭望之宣帝時為少府帝以望之經明持重論議有餘
才任宰相

任堪也

欲詳試其政事復以為左馮翊望之從

少府出為左遷恐有不合意即移病

移病謂移書言病一曰以病而移居

帝聞之使侍中成都侯安上諭意曰所用皆更治民以

考功

更猶言
歷也

前為平原太守日淺故復試之於三輔非

有所聞也

所聞謂間
其短失

望之即視事

王尊為槐里令兼行美陽令事元帝行幸雍過虢尊供
張如法而辨以高第擢為安定太守後為中太僕坐事
左遷高陵令以病免會山南羣盜數百人為吏人害歲
餘不能禽或說大將軍王鳳獨選賢京兆尹乃可於是
鳳薦尊守京輔都尉行京兆尹事旬月間盜賊清

王章為司隸校尉會京兆尹王尊免代者不稱職章以

選為京兆尹

孫寶為諫議大夫鴻嘉中廣漢羣盜起選為益州刺史後為丞相司直會益州蠻夷犯法巴蜀頗不安成帝以寶著名西州拜為廣漢太守秩中二千石賜黃金三十斤蠻夷安輯吏民稱之

彭容哀帝時為漁陽太守有名於邊容貌食飲絕衆是時單于來朝當道二千石皆選容貌飲食士故容徙為雲中太守

後漢郭伋為漁陽太守建武九年潁川盜賊羣起徵拜
潁川太守召見辭謁帝勞之曰賢能太守去帝城不
遠河潤九里冀京師并蒙福也十一年帝以盧芳據北
土乃調伋為并州牧

董宣建武中為懷令後江夏有劇賊夏喜等寇亂羣境
以宣為江夏太守

樊擘為軹長隗囂滅後隴右不安乃拜擘為天水太守
臧宮為輔威將軍建武十一年與吳漢並滅公孫述光

武以蜀地新定拜宮為廣漢太守

祭彤為襄賁令

賁音肥
在今沂州臨沂縣

建武十七年匈奴鮮卑及

赤山烏桓連和彊盛數入塞殺掠吏人朝廷以為憂益增緣邊兵郡有數千人又遣諸將分屯障塞帝以彤為能拜遼東太守

袁安為陰平任城令所在吏人畏而愛之明帝永平十三年楚王英謀為逆事下郡考覆明年三府舉安能理劇拜楚郡太守

王堂為穀城令治有名蹟

穀城縣在今齊州東阿

安帝永初中西

羌寇巴郡為民患詔書遣中郎將尹就攻討連年不克三府舉堂治劇拜巴郡太守

盧植為博士靈帝熹平四年九江蠻反四府選植才兼文武拜九江太守蠻寇賓服

朱雋為太僕光和中賊帥常山人張燕寇河內逼近京師於是出雋為河內太守將家兵擊却之

張綱為侍御史時廣陵賊張嬰殺太守據郡梁冀乃用

綱為廣陵太守綱至乃陳示禍福嬰等開門出降綱乃
撫納離叛使各得安居部內肅清帝嘉之賜錢十萬

賈琮為京兆尹中平元年交趾屯兵反執刺史及合浦
太守自稱柱天將軍帝特勅三府精選能吏有司舉琮
為交趾刺史及徵拜議郎時黃巾新破兵凶之後郡縣
重斂因緣生姦詔書沙汰刺史二千石更選精能吏乃
以琮為冀州刺史

周紆為博平令以威名遷齊相

黃昌為宛令政尚嚴猛皆稱神明朝廷舉能遷蜀郡太守

陽球辟司徒劉寵府九江山賊起連月不解三府上球
有理姦才拜九江太守

王允為侍御史中平初黃巾賊起選拜豫州刺史

糜竺曹公表為嬴郡太守曰泰山郡界廣遠舊多輕悍
權時之宜可分五縣為嬴郡揀選清廉以為守將偏將
軍糜竺素履忠貞文武昭烈請以竺領嬴郡太守撫慰

吏民

劉虞為幽州劉焉為益州劉表為荊州賈琮為冀州虞等皆海內清名之士或從列卿尚書以選為牧伯各以本秩居任傳車參駕施赤帷裳

魏何夔後漢建安中為長廣太守徵還參丞相軍事海賊郭祖寇暴樂安濟南界州郡苦之太祖以夔前在長廣有威信拜樂安太守到官數月諸城悉平

蔣濟楚國人太祖拜濟丹陽太守大軍南征還以溫恢

為揚州刺史濟為別駕令曰李子為臣吳宜有君今君
還州吾無憂矣

杜畿為西平太守太祖既定河北而高幹舉并州反時
河東太守王邑被徵河東人衛固范先外以請邑為名
而內實與幹通謀帝謂荀彧曰關西諸將恃險與馬征
必為亂張晟寇殺澠間南通劉表固等因之吾恐其為
害深河東被山帶河四鄰多變當今天下之要地也君
為我舉蕭何寇恂以鎮之彧曰杜畿其人也於是追拜

畿為河東太守

賈逵為議郎參司隸軍事太祖征馬超至弘農曰此西道之要以逵領弘農太守

晉鄭褒魏末為散騎常侍會廣平太守缺宣帝謂褒曰賢叔大匠垂名稱於陽平魏郡百姓大蒙惠化且盧子

家盧王子雍

王

繼踵此郡使世不乏賢故復相屈

滕脩仕吳為廣州刺史甚有威惠徵為執金吾廣州部典督郭馬等為亂孫皓以脩宿有威惠為領表所服以

為使持節督廣州軍事鎮南將軍廣州牧以討之

阮种自中書郎遷平原相時襄邑衛京自南陽太守遷于河內與种俱拜武帝望而歎曰二千石皆若此朕何憂乎

馬隆初為武威太守大康初朝廷以西平荒毀宜時興復以隆為西平太守

諸葛恢為元帝鎮東從事中郎承制調為會稽太守臨行帝為置酒謂曰今之會稽昔之關中足食足兵在於

良守以君有蒞任之方是以相屈四方分離當恢振圮運政之所先君為言之恢陳謝因對曰今天下喪亂風俗陵遲宜尊五美屏四惡進忠實退浮華帝深納焉

劉弘為荊州刺史平張昌時荆部守宰多缺弘請補選帝從之弘乃敘功銓德隨才補授甚為論者所稱乃表曰被中詔勅臣隨資品選補諸缺吏夫慶賞刑威非臣所專且知人則哲聖帝所難非臣闇蔽所能斟酌然萬事有機毫釐宜慎謹奉詔書差所應用蓋崇化莫若貴

德則所以濟也故太上立德其次立功也頃者多難淳
朴彌凋臣輒以徵士立朝補零陵太守庶以懲波蕩之
弊養退讓之操臣以不武前退於宛長史陶侃參軍荆
常牙門皮初戮力致討蕩滅姦凶侃常各以始終軍事
初為都戰帥忠勇冠軍漢沔清肅實初等之勲也司馬
法賞不踰時欲人知為善之速福也若不超拔無以勸
狗功之士慰熊羆之志臣以初補襄陽太守侃為府行
司馬使典論功事常為山都令詔惟令臣以散補空缺

然汴鄉令虞潭忠誠烈正首倡義舉舉善以教不能者
勸臣輒特轉潭補醴陵令南郡廉吏仇勃母老疾困賊
至守衛不移以致拷掠幾至隕命尚書令史郭真張昌
以為尚書郎欲訪以朝議遁逃不出昌質其妻子避之
彌遠勃孝篤著於臨危負忠厲於疆暴雖各四品皆可
以訓獎臣子長益風教臣輒以勃為歸鄉令真為信陵
令皆功行相參循名較實條列行狀公文具上朝廷以
初雖有功襄陽又是名郡名器宜慎不可授初乃以前

東平太守夏侯陟為襄陽太守餘並從之陟弘之壻也
弘下教曰夫統天下者宜與天下同心化一國者宜與
一國為任若必姻親然後可用則荊州十郡安得十女
壻然後為政哉乃表陟姻親舊制不得相監皮初之勲
宜見酬報詔聽之

陶侃為龍驤將軍武昌太守既破杜弢遣參軍王貢告
捷於王敦敦曰若無陶侯便失荊州矣伯仁方入境便
為盜所破

伯仁周顛字特為荊州刺史

不知那得刺史貢對曰鄙州

方有事難非陶龍驤莫可敦然之即表拜侃為使持節
寧遠軍將軍南蠻校尉荊州刺史領西陽江夏武昌鎮
于沌口

尹奉為零陵太守時王堅代父遜為寧州刺史南夷校
尉陶侃懼不能抗對蜀人太寧未表奉為寧州徵堅還
京

桓伊為大司馬參軍時苻堅強盛邊鄙多虞朝議選能
距捍疆場者乃授伊淮南太守

吳隱之為左衛將軍有廉節時以廣州包帶山海珍異所出一篋之寶可資數世然多瘴疫人情憚焉雖貧窶不能自立不求補長史故前後刺史皆多黷貨朝廷欲革嶺南之弊隆安中以隱之為龍驤將軍廣州刺史假節領平越中郎將

宋胡藩初叅高祖相國軍事屬盧循餘黨與蘇溪賊大相聚結故以藩為始興相

褚淡之初為高祖車騎長史高祖受禪後會稽郡缺朝

議欲用蔡廓高祖曰彼自是蔡家佳兒何關人事可用
褚佛佛淡之小字也乃以淡之為會稽太守

何尚之元嘉中為太子中庶子彭城王義康欲以司徒
左長史劉斌為丹陽尹文帝不許乃以尚之為尹

南齊張冲為廬陵王北中郎司馬未拜豐城公遙昌為
豫州明帝慮寇難未已徙冲為征虜長史南梁郡太守
梁夏侯夔普通二年魏郢州刺史元顯達請降高祖勅
郢州刺史元樹往迎顯達夔亦自楚城會之遂留鎮焉

詔改魏郢州為北司州以夔為刺史兼督司州

陳歐陽頎仕梁為東衡州刺史侯景平元帝遍問朝宰
曰今天下始定極須良才請卿各舉所知羣臣未有對
者帝曰吾已得一人矣侍中王褒進曰未審為誰帝曰
歐陽頎公有經濟之才乃授武州刺史

王勵字公齊仕梁為侍中高祖為丞相以勵兼長史吳
中遭亂民多乏絕乃以勵監吳興郡及蕭勃平後又以
勵舊在嶺表早有政績乃授使持節都督廣等二十州

諸軍事平南將軍平越中郎將廣州刺史未行改為衡
州刺史持節都督並如故王琳據有上流衡廣攜貳勵
不得之鎮留于大庾嶺

吳明徹為鎮東將軍吳興太守及引辭之郡文帝謂明
徹曰吳興郡帝鄉之重故以相授君其勉之

陸繕為侍中時留異擁割東陽新安人向文政與異連
結因據本郡朝廷以繕為貞威將軍新安太守

後魏張烈孝文時為太子步兵校尉齊東昏將陳顯達

治兵漢南謀將入寇時順陽太守王青石世官江南荊州刺史廣陽王嘉慮其有異表請代之帝詔侍臣各舉所知時有申薦者帝曰此郡今當必爭之地須得堪濟之才何容汎舉也太子步兵張烈每論軍國之事時有會人意處朕欲用之何如彭城王勰稱讚之遂勅除陵江將軍順陽太守

卒紹先為神部令獻文帝皇興中薛安都以彭城歸國朝廷欲綏安初附以紹先為下邳太守加寧朔將軍為

政不苟激察舉其大綱而已

辛祥為并州平北府司馬會刺史喪朝廷以其公清遂
越長史勅行州事

薛曇尚為徐州穀陽戍主行南陽平郡事母憂去職孝
明正光中詔以陽平隣接梁地綏捍須人仰尚書舉才
而遣左僕射蕭寶寅舉曇尚應選馳驛之郡

裴慶孫正光末汾州吐京羣胡聚黨作逆慶孫擊之大
潰於後賊復鳩集北連蠡升南通絳蜀亮徒轉盛慶孫

又討之至陽城朝廷以此被山帶河衿要之所遂立邵郡因以慶孫為太守假節輔國將軍

淳于誕孝昌中為巴州刺史朝議以梁州安康郡阻帶江山要害之所分置東梁州仍以誕為鎮遠將軍梁州刺史

北齊高翼渤海人豪俠有風神為州里所宗敬魏孝昌末葛榮作亂於燕趙朝廷以翼山東豪右即家拜渤海太守至郡未幾賊徒愈盛翼部率合境徙居山濟之間

魏因置東冀州以翼為刺史加鎮東將軍

司馬子如初從神武為大行臺郎中元顥入雒人情離阻以子如曾守鄴城頗有恩信乃令行相州事

源文宗為涇州刺史入遷散騎常侍屬秦州刺史宗嵩卒朝廷以州在邊陲以文宗往涖涇州頗著聲績除秦州刺史乘傳之府特給後部鼓吹

王則為征南將軍隨侯景西討景於潁川作逆則鎮柘崖戍文襄以則有武用徵為徐州刺史

後周泉企魏孝武時為東雍州刺史齊神武專政孝武
有西顧之心欲委企以山南之事乃除雒州刺史當州
都督未幾孝武西遷神武率眾至潼關企遣其子元禮
督鄉里五千人北出大谷以禦之齊神武不敢進梁魏
興與雒州接壤表請內屬詔企為行臺尚書以鎮之大
行臺賀拔岳以企昔蒞東雍為吏民所懷乃表企復為
刺史詔許之

令狐整為司憲中大夫初梁興州刺史席固以州來附

文帝以固為豐州刺史固蒞職既久猶習梁法凡所施為多虧政典朝議密欲代之而難其選令整權鎮豐州委以代固之畧整廣布威恩傾身撫綏數月之間化洽州府於是除整豐州刺史以固為湖州

申徽為都官尚書時瓜州刺史成慶為成人張保所殺都督令狐延等起義逐保啓請刺史以徽信洽西土拜假節瓜州刺史

王罷為右將軍與別將裴衍破梁將曹義宗于荊州時

諸方鼎沸所在凋殘荊州新經寇難尤藉慰撫以罷為
荊州刺史

郭彥為中部中大夫鎮豫州武定中純州刺史樊含卒
其地既東接陳境俗兼蠻左初喪主境內騷然朝議以
彥威信著於東南便令鎮撫彥至吏民畏而愛之

李遠為大丞相府司馬時河東初復民情未安太祖謂
遠曰河東國之要鎮非卿無以撫之乃授河東郡守

揚雄為涪州刺史蠻帥文子榮竊據荊州之汶陽郡又

侵陷南郡之當陽臨沮等數縣詔遣開府賀若敦潘招等討平之即以其地置平州以雄為刺史

權景宣為廣州刺史侯景舉河南來附景宣從僕射王思政經畧應接既而侯景南叛恐東魏復有其地以景宣為豫州刺史鎮樂口

章世康為司會中大夫尉遲迥之亂隋文帝為相國謂世康曰汾絳舊是周齊界因此亂階恐生搖動今以委公因授絳州刺史以雅望鎮之闔境清肅

隋公孫景茂初仕後周為濟北太守以母憂去職開皇
初詔徵入朝訪以政術徵拜汝南郡太守

和洪初仕周為儀同令龍州蠻聚眾為亂刺史獨孤善
不能禦朝議以洪有武畧代善為刺史後為折衝中大
夫高祖為丞相時東夏初平物情尚梗高祖以洪有威
名令領冀州事甚得人和

樊叔畧開皇初為汴州刺史鄴都俗薄號曰難化朝廷
以叔畧所在著稱遷相州刺史

柳儉開皇初為廣漢太守有能名時高祖勵精思政妙簡良能出為牧宰以儉仁明著稱擢拜蓬州刺史

衛玄拜魏郡太守高祖謂玄曰魏郡名都衝要之所民多姦宄是用煩公此郡去都道里非遠宜數往來詢謀朝政賜物五百段而遣之

侯莫陳穎為邢州刺史時朝廷以嶺南刺史縣令多貪鄙蠻夷怨叛妙簡清吏以鎮撫之於是徵穎入朝拜桂州總管十七州諸軍事及到官大崇恩信民夷悅服溪

洞生越多來歸附後為常山太守時嶺南閩越多不附
帝以頴前在桂州有惠政為南土所信服復拜南海太
守

令狐熙為滄州刺史高祖太山還次汴州惡其殷盛多
有奸俠以熙為汴州刺史

高勵為上開府時隴右諸羌數為寇亂朝廷以勵有威
名拜洮州刺史

長孫平歷許貝二州俱有善政鄴都俗薄舊號難治前

後刺史多不稱職朝廷以平所在稱善轉相州刺史甚有能名

郭絢大業中煬帝將有事於遼東以涿郡為衝要訪可任者聞絢有幹局拜涿郡丞

丘和為天水郡守大業末以海南僻遠吏多侵漁百姓咸怨數為亂逆於是選淳良太守撫之黃門侍郎裴矩言和歷居二郡皆以惠政著聞寬而不擾帝從之追和為交趾太守

唐武士護武德末判六尚書事揚州有人告趙郡王孝恭有變追入京屬吏高祖令士護馳驛簡校揚州都督府長史

陳政初為宇文化及太常卿亡歸長安授內史舍人時漢川多盜賊高祖曰吾前欲授卿梁州總管論者以為大擾吾度梁漢之任非卿不可政曰臣歸國日淺未由報効蜀漢既清無可展力今山東尚擾化及未平願得執鞭行陣少答萬一高祖曰漢川作牧山東振旅並為

卿任遂授以梁州兼令安撫

蕭瑀為中書令時州置七職務取才望兼善者為之時
太宗臨雍州牧以瑀為州都督

高士廉為光祿大夫太宗以蜀王恪為益州大都督幼
未之藩以士廉有重望才足鎮靜方面拜左光祿大夫
行益州大都督府長史

楊恭仁貞觀五年遷雒州都督太宗謂曰雒陽要重古
難其人朕之子弟多矣恐非所任特以委公也

韋嗣立為鳳閣侍郎則天長安中納言李嶠夏官尚書
唐休景等奏曰臣等並以凡才謬膺大任不能使兵革
止息倉府殷盈戶口尚有逋逃官人未免濫濁使陛下
臨朝軫念屢以為言夙夜慙惶不知啓處伏思當今要
務莫若富國安人安人之方在擇刺史竊見朝廷物議
遠近人情莫不重內官輕外職每出除授牧伯皆再三
披訴比來所遣外任多是貶累之人風俗不澄寔由於
此今望於臺閣寺監妙簡賢良分典大州共康庶績臣

等請輟近侍率先具僚務在憂國濟人庶當有所補益
則天曰卿等處鸞臺鳳閣誰為此行嗣立對曰臣以庸
愚謬膺獎擢參掌機密非所克堪承乏外臺庶當盡節
儻垂採錄臣願此行上令書名共探著者則去既而嗣
立探得之於是命嗣立及御史大夫楊再思等二十人
各以本官簡校刺史其後以政績可稱者惟常州刺史
薛謙光徐州刺史司馬鎰二人後玄宗時謙光為太子
賓客元行冲為散騎常侍開元三年詔曰周命召奭相

宅建邦漢命蕭何留臺作鎮眷言斯土任在其人太子
賓客昭文館學士薛謙光右散騎常侍元行冲等國之
耆儒朝之碩彥舉直錯枉清心不可容非殫見洽聞白
首以之從學履歷時久精明日新必能慎固邦畿保釐
都邑佇成居守之務宜叶往俞之委謙光宜充東都留
守行冲為副

王丘開元十二年以黃門侍郎為懷州刺史崔沔以中
書侍郎為魏州刺史王易從以吏部侍郎為揚州大都

督府長史韓休以禮部侍郎為虢州刺史張景昇以大
理少卿為滑州刺史王昱以京兆少尹為常州刺史制
曰昔臯繇與禹言乃曰在知人在安民此皆念在邦本
光于帝載乾乾夕惕無忘厥旨而長吏不稱蒼生靡寧
深思循良以矯過弊仍重諸侯之選故自朝廷之始王
丘等行為時宗才稱人秀寔有懿德著于衣冠加之善
政布在臺閣咸以脩身之府載深經國之圖朕所明知
躬自推擇是有煩卿之寄用彰恤下之心俾牧人宣條

無媿於明哲而變風致理可輯於遺黎爾其克沃朕心
式欽往命因勅宰臣曰朕欲妙擇牧宰以崇風化亦欲
重其資望以勵衣冠自今以後三省侍郎有缺先求曾
任刺史者郎官缺先求曾任縣令者

源光裕開元十三年以大理卿為鄭州刺史楊承令以
尚書左丞為汾州刺史許景先以吏部侍郎為虢州刺
史寇泚以兵部侍郎為宋州刺史鄭溫琦以禮部侍郎
為邠州刺史李昇以宗正卿為邢州刺史袁仁敬以大

理少卿為杭州刺史崔志廉以鴻臚少卿為襄州刺史
蔣挺以國子司業為湖州刺史裴觀以左威衛將軍為
滄州刺史崔誠以左司禦率府副率為遂州刺史初帝
謂宰臣曰刺史之任必在得人卿即於諸司中選有寔
望長官奏來朕自選擇乃有茲授

蘇震為太常卿是歲東都耆老表乞行幸帝重違其心
乃選耆舊勲賢為之牧守遂以震為河南尹兼御史中
丞仍充東都畿內觀察使

李峴天寶末為京兆尹著聲績楊國忠惡其不附已出
為長沙太守肅宗至德初朝廷務收才傑以清寇難峴
應召至行在拜扶風郡太守兼御史大夫既收京師拜
禮部尚書守京兆尹復兼御史大夫

李泌天寶末為澧州刺史詔曰今荆南都會粵在澧陽
俾人歸厚惟賢是收以泌文可以化成風俗政可以全
活博養爰命頒條期乎共理無薄淮陽之守勉思渤海
之功其見重如此

嗣曹王臯為處州別駕行州事人使之徵至京師久之
未得召見因上書言理道拜衡州刺史

李峴為戶部尚書肅宗以兵興之故軫慮遠人乃拜峴
都統江淮節度觀察使

敬括為大理卿志尚簡淡代宗大歷初叛臣周智光復
反詔選循良為近輔以括為同州刺史

李紆建中末為禮部侍郎德宗居奉天擇領三輔乃授
同州刺史兼御史中丞

張建封貞元初為壽州刺史會高承宗父子獨孤萃相
次為徐州刺史人浸貧困不能自存又以咽喉要地據
江淮運路朝廷思擇重臣以鎮者久之至是以建封為
徐州刺史

吳湊為右金吾大將軍貞元十四年京兆尹韓臯貶撫
州員外司馬特召湊對於延英面授京兆尹令便視事
尚未有制

裴佶遷諫議大夫會黔中觀察使韋士文慘酷馭下為

夷獠所逐俾佶代之酋渠自化

李栖筠為浙西觀察使先是土豪方清乘歲凶歎誘聚
餓隸於黠歛間其衆數萬以殘害生人據守山險州郡
不能制副元帥李光弼奉朝命徵諸侯兵以討之賊平
獨有平盧行軍司馬兼御史中丞許果恃兵精功多逼
留於上元不發有窺覷要害之意朝廷以瘡痍之後重
興干戈乃以栖筠為浙西以鎮之

趙昌貞元七年為處州刺史屬安南都護為夷獠所逐

遂拜安南都護夷人率化十餘年因屋壞傷脛懇疏乞
還以簡校兵部郎中裴泰代焉拜國子祭酒及泰為首
領逐出德宗召昌問狀昌時年七十二而精健如少年
者德宗竒之復命為都護南人相賀

李鄴初為京兆尹遷尚書左丞憲宗元和初以京師多
剽竊復選為京兆尹摧奸肅物威望甚著

孔戣為國子祭酒初廣州崔詠卒宰臣奏擬皆不可帝
因謂裴度嘗有諫進海蚶淡菜者詞甚忠正卿可求此

人度出以訪人或有言幾諫者度即以聞乃命為廣州刺史

辛秘為河南尹是時以再討王承宗以潞州壓賊境凋費尤甚朝議以兵革之後思能完復者乃命秘為潞州大都督府長史

盧士攻為京兆少尹穆宗長慶初奉憲宗園寢刑簡事集時論推其有才擢拜大尹

陳楚為義武軍節度長慶二年七月為東都留守居守

之任故事或用舊德或用故相未嘗以武將而當保釐之重蓋浚郊有事地逼封圻遂用勲臣俾專守禦且非舊制尋亦改焉

令狐楚鎮鄆州時北門大旱文宗意憂軫以楚理鄆有績擢為北都留守兼太原尹楚久在并州練其風俗因人利之故封內晏然

丁公著為禮部尚書翰林侍講學士文宗以浙西災疫詢求良帥命公著簡校戶部尚書為浙西觀察使

田牟開成中為隴州刺史會鹽州刺史王宰好以法臨黨項羌人不安以牟寬厚故命易之

後唐劉遂清字得一初仕梁為保鑾軍使歷內諸司使明宗即位加簡校尚書右僕射委以西都監守踰歲以中山王都有不臣之跡除遂清為易州刺史俾遏其寇衝既至郡大有禦侮之畧境內賴焉王都平加簡校司空遷棣州刺史

冊府元龜卷六百七十一

欽定四庫全書

冊府元龜卷六百七十二 宋 王欽若等 撰

牧守部

褒寵

夫懋功賞善有國之令典也蓋夫長人之寄共治為重
實勸能之所先非庶尹之可擬中葉而下循吏繼踵乃
有勤脩厥職克揚善政彈擊豪橫完補凋瘵捍患屏寇
務穡敦本式遏夷貊詳明獄犴清白以自守傾竭而奉

上苛慝不作繕治以時遺愛在民藹然垂裕而君人者
莫不優異其爵秩便蕃其賜予或明詔申獎或延見勞
問乃至崇進禮命嚴設圖像周旋宴喜臨視歎息抑情
從事起家延賞恩流闔境昭示溥率逮乎既沒尚增追
悼贈贈之禮名數有加躬臨以發哀節惠以著美方牘
所載咸可徵焉

漢王訢守右扶風武帝數出幸安定北地過扶風宮館
馳道脩治供張辨帝嘉之駐車拜訢為真視事十餘年

王成為膠東相治甚有聲宣帝最先褒之地節三年下
詔曰蓋聞有功不賞有罪不誅雖唐虞不能以化天下
今膠東相成勞來不怠謂勸勉招懷百姓也治有異等之効異於常等
其賜成爵關內侯秩中二千石

黃霸為揚州刺史三歲宣帝下詔曰制詔御史其以賢
良高第揚州刺史霸為潁川太守秩比二千石居官霸
在潁川前後八年郡中愈治是時鳳凰神雀數集郡國
潁川尤多天子以霸治行終長者下詔稱揚曰潁川太

守霸宣布詔令百姓鄉化孝子悌弟貞婦順孫日以衆
多田者讓畔道不拾遺養視鰥寡贍助貧窮獄或八年
亡重罪囚吏民鄉於教化興於行誼可謂賢人君子矣
書不云乎股肱良哉其賜爵關內侯黃金百斤秩中二
千石

杜延年為北地太守治郡不進宣帝以璽書讓延年延
年乃選用良吏捕擊豪強郡中清靜居歲餘帝使謁者
賜延年璽書黃金二十斤徙為西河太守治甚有名

王尊任東郡太守河水盛溢尊請以身填金堤水稍却
吏民嘉壯尊之勇節白馬三老朱英等奏其狀下有司
考皆如言於是制詔御史東郡河水盛長毀壞金堤未
決三尺百姓惶恐奔走太守身當水衝履咫尺之難不
避危殆以安衆心吏民復還就作水不為災朕甚嘉之
秩尊中二千石加賜黃金二十斤

蕭育為右扶風太守會南郡江中多盜賊拜育為南郡
太守哀帝以育者舊名臣乃以三公使車載育入殿中

受策

使車三公奉使之車若安車也

曰南郡盜賊羣輩為害朕甚憂之

以太守威信素著故委南郡太守之官期於為民除害
安元元而已亡拘於小文加賜黃金二十斤

雋不疑為青州刺史齊孝王孫劉澤交結郡國豪傑謀
反欲先殺青州刺史不疑發覺收捕皆伏其辜擢為京
兆尹賜錢百萬

陳立為牂牁太守平定西夷徵詣京師會巴郡有盜賊
復以立為巴郡太守秩中二千石居賜爵左庶長

第十爵也

徙為天水太守勸民農桑為天下最賜金四十斤

後漢任延為會稽郡尉建武初延上書願乞骸骨歸拜
王庭詔徵為九真太守光武引見賜馬雜繒令妻子留

雒陽

郭伋為并州牧過京師謝恩光武引見并召皇太子諸
王宴語終日賞賜車馬衣服什物

鄧晨為汝南太守光武行幸章陵徵晨行廷尉事從至
新野置酒酣讌賞賜數百千萬復遣歸郡

衛颯為桂陽太守視事十年郡內清理建武二十五年徵還光武欲以為少府會颯被疾不能拜起勅以桂陽太守歸家須後詔書居二歲載病詣闕自陳困篤乃收印綬賜錢十萬後卒于家

杜詩為南陽太守視事七年政化大行會病卒司隸校尉鮑永上書言詩貧困無田宅喪無所歸詔使治喪郡邸賻絹千疋

宣秉字巨公為司隸校尉秉性節約嘗服布被蔬食瓦

器光武嘗幸其府舍見而歎曰楚國二龔不如云陽宣
巨公即賜布帛帳幃什物

羊續為南陽太守徵為太常未及行會病卒時年四十
八遺言薄殮不受賄遺舊典二千石卒官賻百萬府丞
焦儉遵續先意一無所受詔書褒美勅太守以府賻錢
賜續家

樊擘為天水太守卒官永平中明帝追思擘在天水時
政能以為後人莫之及詔賜家錢百萬

祭彤為遼東太守徵為太僕彤在遼東幾三十年衣無兼副明帝既嘉其功又美彤清約拜日賜錢百萬馬三匹衣被刀劍下至居室什物大小無不悉備

郭賀字喬卿拜荊州刺史引見賞賜恩寵隆異及到官有殊政明帝巡狩到南陽特見嗟嘆賜以三公之服黼黻冕旒勅行部去襜帷使百姓見其容服以章有德每所經過吏人指以相示莫不榮之遷河南尹在官三年卒詔愍惜賜車一乘錢四十萬

秦彭為潁川太守章帝巡行再幸潁川輒賞賜錢穀恩寵甚異

宋均為河內太守以疾上書乞免詔除子條為太子舍人均自扶輿詣闕謝恩章帝使中黃門慰問因留養疾司徒缺帝以均才任宰相召入視其疾令兩騶扶之均拜謝曰天罰有罪所苦浸篤不復奉望帷幄因流涕而辭帝甚傷之召條扶持均出賜錢三十萬

張酺以尚書授皇太子及章帝即位擢酺為侍中虎賁

中郎將數月出為東郡太守酺自以嘗經親近未悟見
出意不自得上疏辭曰臣愚以經術給事左右少不更
職不曉文法猥當剖符典郡班政千里必有負恩辱位
之咎臣竊私自分殊不慮出城闕冀蒙留恩託備冗官
郡僚所不安耳目所聞見不敢避好醜詔報曰經云身
雖在外乃心不離王室典城臨民益所以報効也好醜
必上不在遠近今賜裝錢三十萬其亟之官

陳球為零陵太守會州兵朱蓋等反與桂陽賊胡蘭數

萬人轉攻零陵球率衆城守遂斬朱蓋等賜錢五十萬
拜子一人為郎遷魏郡太守

李進為武陵太守婁中澧中蠻舉種反叛進討破之進
乃簡選良吏得其情和在郡九年梁太后臨朝下詔增
進秩二千石賜錢二十萬

鄭純為永昌郡西部都尉為政清潔化行夷貊君長感
慕皆獻上珍頌德美功天子嘉之即以為永昌太守

陸康為廬江太守獻帝即位天下大亂康蒙險遣孝廉

計吏奉貢朝廷詔書策勞加忠義將軍秩中二千石

魏呂虔漢末領泰山太守時濟南黃巾徐和尊所在劫
長吏攻城邑虔引兵與夏侯淵會擊之前後數十戰斬
首獲生數千人太祖使督青州諸郡兵以討東萊羣賊
李條等有功太祖令曰夫有志必成其事蓋烈士之所
徇也卿在郡以來擒姦討暴百姓獲安躬蹈矢石所征
輒克昔寇恂立名於汝潁耿弇建策於青兗古今一也
舉茂才加騎都尉典郡如故

杜畿為河東太守平虜將軍劉勲為太祖所親貴震朝
廷嘗從畿求大棗畿拒以他故後勲伏法太祖得其書
歎曰杜畿可謂不媚於寵者也稱畿功美以下州郡曰
仲尼之於顏子每言不能不歎既情愛發中又宜率馬
以驥今吾亦冀衆人仰高山慕景行也太祖西征至蒲
陂與賊夾渭為軍軍食一仰河東及賊破餘畜二十餘
萬斛太祖下令曰河東太守杜畿孔子所謂禹吾無間
然矣增秩中二千石又令曰昔蕭何定關中寇恂平河

內卿有其功間將授卿以納言之職顧念河東吾股肱郡充實之所足以制天下故且煩卿卧鎮之畿在河東十六年常為天下最文帝即王位賜爵關內侯徵為尚書及踐阼進封豐樂亭侯邑百戶

賈逵為議郎叅司隸軍事太祖征馬超至弘農曰此西道之要以逵領弘農太守召見計事大悅之謂左右曰使天下二千石悉如賈逵吾何憂逵後為豫州刺史兵曹從事受前刺史賈逵到官數月乃還考竟其二千石

以下阿從不如法者皆舉免之帝曰遠真刺史矣布告天下當以豫州為法賜爵關內侯

梁習以別部司馬為并州刺史單于恭順名王稽顙部曲服事供職同於編戶邊境肅清百姓布野勤勸農桑令行禁止貢達名士咸顯於世太祖嘉之賜爵關內侯文帝踐阼復為并州刺史進封申門亭侯邑百戶

蘇則試守金城太守文帝令問雍州刺史張既曰試守金城太守蘇則既有綏民平夷之功聞又出軍西定湟

中為河西作聲勢吾嘉之則之功效為可加爵邑未邪
封爵重事故以問卿密白意且勿宣露也既答曰金城
郡昔為韓遂所見屠剝死喪流亡或竄戎狄或陷寇亂
戶不滿五百則到官內撫凋殘外鳩離散今見戶千餘
又梁燒雜種羌昔與遂同惡遂斃之後越出障塞則前
後招懷歸就郡者三千餘落皆卹以威恩為官效用西
平麴演等唱造邪謀則尋出軍臨其項領演則歸命送
質破絕賊糧則既有卹民之效又能和戎狄盡忠效節

遭遇聖明有功必錄若則加爵邑誠足以勸忠臣勵風俗也帝以其功加則護羌校尉賜爵關內侯

王思領豫州刺史思與薛悌郤嘉俱從微起官位畧等三人中悌差挾儒術所在名為閑省嘉與思事行相似文帝詔曰薛悌駁吏王思郤嘉純吏也各賜關內侯以報其勤

游楚為隴西太守太和中諸葛亮出隴右楚堅守亮退以功封列侯明帝嘉其治詔特聽朝引上殿楚為人短

小而大聲自為吏初不朝覲被詔登階不知儀式帝令侍中贊引呼隴西太守前楚當言唯而大應稱諾帝顧之而笑遂勞勉之罷會自表乞留宿衛拜駙馬都尉

鄭渾為魏郡太守以郡下百姓苦乏材木乃課樹榆為籬并益樹五果榆皆成藩五果豐實入魏郡界村落齊整如一民得財足用饒明帝聞之下詔稱述布告天下遷將作大匠

晉魯芝初仕魏為天水太守郡鄰于蜀數被侵掠戶口

減削寇盜充斥芝傾心鎮衛更造城市數年間舊境悉
復遷廣平太守天水夷夏慕德老幼赴闕獻書乞留芝
明帝許焉仍策書嘉歎勉以黃霸之美加討寇將軍

羅憲初仕蜀為巴東太守劉禪歸順加陵江將軍領武
陵太守泰始初入朝詔曰憲忠烈果毅有才策器幹可
給鼓吹又賜山玄玉佩劍

向雄泰始中為秦州刺史假赤幢曲蓋鼓吹賜錢二十
萬

王宏為汲郡太守泰始五年十月詔以司隸校尉石鑒所上宏勤恤百姓導化有方督勸開荒五千餘頃遇年普饑而郡界獨無匱乏可謂能以勸教時同功異者矣其賜穀千斛布告天下

傅詢為平州刺史咸寧二年與前廣平太守孟桓以清白有聞詢賜帛二百疋桓百疋

劉霄為京兆太守梁柳為陽平太守大康十年以有政績各賜穀千斛

鄭默為東郡太守值歲荒人饑默輒開倉賑給乃舍都亭自表待罪朝廷嘉默憂國詔書褒歎比之汲黯班告天下若郡縣有此比者皆聽出給

諸葛恢為會稽內史太興初以政績第一詔曰自頃多難官長數易益有諸弊雖聖人猶久於其道然後化成況其餘乎漢宣帝稱與我共安天下者其惟良二千石斯言信矣是以黃霸等或十年或二十年而不徙所以能濟其中興之勲也賞罰黜陟所以明政道也會稽內

史諸葛恢蒞官三年政清人和為諸郡首宜進其位班以勸風教令增恢秩中二千石

吳隱之為廣州刺史清操逾厲元興初詔曰夫家行篤於閨門清節厲乎風霜實立人之所難而君子之美致也龍驤將軍廣州刺史吳隱之孝友過人祿均九族菲已潔素儉愈魚殮處可欲之地而常能不改其操饗惟錯之需而家人不易其服革奢務嗇南域改觀朕有嘉焉可進號前將軍賜錢五十萬穀千斛

宋毛脩之為河南河內二郡太守行四州事戍雒陽脩
治城壘高祖既至案行善之賜衣服玩好當時評直二
十萬

徐豁為始興太守元嘉三年遣大使巡行四方并使郡
縣各言損益豁因表陳三事文帝嘉之下詔曰始興太
守豁潔己退食恪居在官政事脩理惠澤沾被近嶺南
荒弊郡境尤甚拯卹有方濟厥饑饉雖古之良守蔑以
尚焉宜蒙褒賞以旌清績可賜絹三百疋穀千斛後以

為廣州刺史未拜卒帝又下詔謚廉清勤恪著稱所司故擢授南服申其才志不幸喪殞朕甚悼之可賜錢十萬布百疋以營葬事

王歆之為晉史序王珣貨殖珣子弘貴顯歆之懼為所陷出為吳興太守王弘入為相領揚州刺史弘雖與歆之不絕諸弟未相識者皆不復往來歆之在郡嘗慮為弘所繩夙夜勤勵政績甚美弘亦抑其私憾文帝兩嘉之在任積年稱為良守加秩中二千石

沈懷文父宣為新安太守及丁父憂新安郡送故豐厚
奉終禮畢餘悉頒之親戚一無所留文帝聞而嘉之賜
奴婢六人

陸徽為益州刺史亡之日家無餘財文帝甚痛惜之詔
曰徽勵志廉潔歷任恪勤奉公盡誠克己無倦褒榮未
申不幸夙殞言念在懷以為傷恨可贈輔國將軍本官
如故賜錢十萬米二百斛謚曰簡子

劉秀為雍州刺史卒孝武以其蒞官清潔家無餘財賜

錢三十萬布三百疋

南齊張岱吳郡人建元元年出為左將軍吳郡太守太祖知岱歷任清直至郡未幾手勅岱曰大邦任重乃未欲迴換但總戎務殷宜須望實今用卿為護軍加給事中岱拜竟詔以家為府

劉懷慰為齊郡太守不受請謁民有餉其新米一斛者懷慰出所食麥飯示之曰旦食有餘幸不煩此著廉吏論以達其意太祖聞之手勅褒賞進督秦沛二部妻子

在郡賜米三百斛兗州刺史柳世隆與懷慰書曰膠東
潤化潁川致美以今方古曾何足云

傅琰再為山陰令縣內稱為神明武帝永明三年徙廬
陵王安西長史南郡內史行荊州軍事五年卒琰喪西
還詔出臨

蕭子顯為吳興太守至郡未幾卒詔曰仁威將軍吳興
太守子顯神韻峻舉宗中佳器分竹未久奄至喪殞惻
愴于懷可贈侍中中書令今便舉安

丘仲孚為豫章內史頃之卒詔曰豫章內史丘仲孚重
試大邦責以後効非直悔吝云亡實亦政績克舉不幸
殞喪良以傷惻可贈給事黃門侍郎

何遠為武康令高祖聞其能擢為宣城太守遷新興內
史天監十六年詔曰何遠前在武康已著廉平復蒞二
邦彌盡清白政先治道惠留民愛雖古之良二千石無
以過也宜升內榮以顯外績可給事黃門侍郎遠即還
仍為仁威長史

陳劉師知祖奚之仕齊為淮南太守有能政武帝手詔
頻褒賞之

袁樞為丹陽尹以葬父拜表自解詔賜絹布五十疋錢
十萬令葬訖停宅視郡事葬服闋復本職

蕭濟為揚州長史嘗勅取揚州曹事躬自覽見濟條理
詳悉文無滯害乃顧謂左右曰我本期蕭長史於經傳
不言精練繁劇乃至於此遷祠部尚書加給事中

後魏司馬準晉汝南王亮之後也明元時歸魏為廣寧

太守悅近來遠清儉有稱太武嘉之賜布六百疋

陸馥為相州刺史徵為散騎常侍民乞留馥者千餘人
獻文不許謂羣臣曰馥之善政雖復古人何以加之賜
絹五百疋奴婢十口

源賀為冀州刺史賀鞠獄以情徭役簡省時考殿最賀
治為第一賜衣馬器物班宣天下

鹿生為濟南太守有治稱獻文嘉其能特徵赴季秋馬
射賜以驄馬加以青服彰其廉潔

薛拔為冠軍將軍豫州刺史延興三年拔與南充州刺史游明根南平陽太守許含等以治民著稱徵詣京師獻文親自勞勉復令還州

任城王雲為徐州刺史性善撫綏得徐方人心以蓋太妃憂去官為百姓所追戀餘錢貨一無所受獻文聞而嘉之復拜侍中中都大官賜帛千疋羊千口出為冀州刺史乃心政事甚得下情於是合州請戶輸絹五尺粟五升以報雲恩孝文嘉之遷使持節都督陝西諸軍事

征南大將軍良安鎮都大將軍雍州刺史雲廉謹自脩
留心庶獄挫豪強盜息止州民頌之者千有餘人文明
太后嘉之賜帛千疋

武昌王鑒為齊州刺史時革變之始百度惟新鑒上書
遵孝文之旨不采齊之舊風軌制粲然皆合規矩孝文
覽其所上嗟美者久之顧謂侍臣曰諸州刺史皆能如
此變風易俗更有何難下詔褒美頌之天下一如鑒所
上齊人愛詠咸曰耳目更新

韋珍孝文時為顯武將軍郢州刺史在州有聲績朝廷嘉之遷龍驤將軍賜驎騮二匹帛五十疋穀三百石珍乃召集州內孤貧者謂曰天子以我能撫綏卿等故賜以穀帛吾何敢獨當遂以所賜悉分與之

裴仲規為咸陽王禧司州主簿行建興郡事車駕自代還雒次於郡境仲規備供帳朝於路側孝文詔仲規曰朕開置神畿畿郡望重卿既首應司隸美舉復督我名邦何能自致也仲規對曰陛下窮神盡聖應天順民棄

彼玄壤來宅紫縣臣方罄心力躍馬吳會冀功銘帝籍
勲書王府豈一郡而已孝文笑曰裴卿必副此言

韋崇為南潁川太守郡中大治孝文聞而嘉賞賜帛二
百疋

呂羅漢為秦益二州刺史孝文詔羅漢曰赤水羌民遠
居邊土非卿善政何以招輯卿所得口馬表求奉貢朕
嘉乃誠便勅領納其馬付都牧口以賜卿

楊椿出為安遠將軍豫州刺史孝文自雒向豫幸其州

館信宿賜馬十匹練千疋遷冠軍將軍濟州刺史孝文
自鍾離趣鄴至礮碣幸其州館又賜馬二匹練千五百
疋

楊懿為廣平太守有稱績孝文南巡吏人頌之加寧遠
將軍賜帛三百疋

李祥為淮陽太守勸課農桑百姓安業宣武嘉之賜以
衣馬

李平為司徒左長史行相州事宣武至鄴親幸平第見

其諸子尋正刺史加征虜將軍

路邕陽平清淵人宣武時積功勞除齊州東魏郡太守
有惠政靈太后詔曰邕蒞政清勤善綏民俗比經年儉
郡內饑饉羣庶嗷嗷將就溝壑而邕自出家粟賑賜貧
窘民以獲濟雖古之良守何以尚茲宜見霑錫以垂獎
勸可賜飛龍廐馬一匹衣一襲被褥一具頒宣州鎮咸
使知聞邕以善治民稍遷至南青州刺史

于雒拔為營州刺史以治有能名進號安東將軍

公孫邃為青州刺史以邃在公遺跡可紀下詔褒述加
鎮東將軍領東夷校尉

崔振字延根為高陽內史兼領尚書左丞後改定職令
振本資准擬五品詔曰振在郡著績宜有褒昇除太子
庶子

李恩穆為京兆內史在郡八年頗有政績徵拜光祿大
夫孝明初除平北將軍中山太守未拜遷安北將軍營
州刺史卒於位贈安西將軍華州刺史

李韶為冀州刺史清簡愛民甚收名譽政績之美聲冠
當時孝明嘉之就加散騎常侍遷車騎大將軍賜劔珮
貂蟬各一具驕騮馬一匹并衣服寢具後為定州刺史
正光末卒於官賻帛七百疋贈侍中持節散騎常侍車
騎大將軍司空公雍州刺史謚曰文恭

崔光伯除北海太守有司以其更滿依例奏代孝明詔
曰光伯自蒞海沂清風遠著兼其兄光韶復能辭榮侍
養兄弟忠孝宜用甄錄可更申一年以勵風化

崔亮為雍州刺史亮性公清敏于斷決所在並號稱職
三輔服其德政孝明嘉之詔賜衣馬被褥

楊藻為建德太守以清貧賜帛六十疋

裴他為荊州刺史有異政加撫軍將軍又遷中軍將軍
羊敦為廣平太守雅性清儉朝廷以其清白賜穀一千
斛絹一百疋

北齊李密為襄州刺史在州十餘年甚得安邊之術威
信聞於境神武頻降手書勞問并賜口馬


李會為高陽內史神武東巡郡國瀛州城西駐馬久立使使慰之曰孤在晉陽知山東守唯卿一人用意及入境觀風信如所聞但善始令終將位至不已

李稚廉為濟州長史神武行經冀州令總河北六州文籍商較戶口增損神武親自部分多在馬上徵責文簿指引取備事緒非一稚廉每應立成常先期會莫不雅合深旨為諸州準的神武顧謂司馬子如曰觀稚廉處分快人意也因集文武數萬人令郎中杜弼宣旨慰勞

仍詰諸州長史守令等諸人並謝罪雅廉獨前拜恩觀者咸歎美之其日賜以牛酒高祖還并以其事告文襄喜而語人曰吾足知人矣

唐邕出為趙州刺史武成謂邕曰朝臣未有帶侍中護軍中正作州者以卿故有此舉放卿百餘日休息至秋間當即追卿

許惇為陽平太守治為天下第一特加賞異圖形於闕詔頒天下



冊府元龜卷六百七十二